

Varios persona reconoci den cuadro di Dia di Rasa

ORANJESTAD – Pa conmemora e fecha di 12 di october cu ta e fecha historico cu Columbus a yega nos continente Americano na 1492, Biblioteca Nacional Aruba (BNA) a organisa un actividad cultural inspira den e genero musical Caribeño conoci como Salsa.

E linguista, literato y investigador cultural, Mirto Lacle, a percura cu e fecha aki por

a haya otro dimension, y no di esun cu historia. Pa duna contenido na e conmemoracion aki, sr. Lacle a referi na e proceso cu a tuma luga riba nos continente di e mescla di e diferente rasa cu a haci posibel cu nos ta rico den diversidad di cultura, expresion folklorico y musical. Un expresion musical di nos region Caribense ta salsa.

E anochi ey den presencia di publico, sr. Lacle a presenta un charla bou titulo: Salsa di



Caribe pa Mundo, unda el a referi tocante con a bini cu e tipo di musica bailabel aki ta wordo yama Salsa? Kendenan ta e pioneronan di e fenomeno musical y contagioso aki? Kico a conduci na e exito mundial di e genero musical aki?

El a haci entrega di un reconocimiento na e musico local Robert Jeandor pa su trayectoria musical y como exponente di musica salsa. Tambe el a entrega un reconocimiento na e baluartenan di nos isla, Jose Dania kende a caba

di celebra 98 aña, y cu a comparti un bolo cu e publico presente. E productor di television, George Jacobs tambe a ricibi un reconocimiento pa su trabou na fabor di cultura. E anochi aki a wordo presenta un documentario bou e nomber El Museo de La Salsa, situa na Puerto Rico. Ta trata di un museo dedica na salsa, salsero, sonero, sonera, memorabilia, potret, uniform di agrupacionnan salsero, instrument, cassette, VHS, caratula (hoes) di long play y hopi mas cu tin di haber cu e

genero musical salsa.

Sr. Lacle a traha e documentario aki hunto cu George Jacobs kende tabata co productor. El a entrevista Roberto Padilla kende ta e creador y propietario di e Museo de La Salsa. Sr. Padilla ta un investigador y coleccionista pa casi 50 aña riba tur loke tin di haber cu Salsa.

Awe, diabierna dia 20 di october 2017, pa 9:30pm. na Telearuba, canal 13 ta wordo transmiti e documentario aki, El Museo de la Salsa.